

# Frar Mattias e sia istorgia d'amur

DA CLAUDIA CADRUVI / ANR

■ **Quai spetgan ins il pli davos en claustra. E gist quai raquinta frar Mattias che viva cun radund 25 confrars en la claustra benedictina ad Uznach. Ina istorgia d'amur.** Gia baud, cun quattordesch onns, ha el sentì il desideri da gidar ils paupers ch'endiran fom. Ha el gia da lez temp savì ch'el veglia ir en claustra? «Oh, sch'jau vi declerar quai, datti bunamain in roman», manegia frar Mattias e ri. Ma el cumenza curaschusamain a raquintar.

## Tavanasa u Dieu vegn pli tard

Creschì si è Giusep Mattias Beer (1955) a Tavanasa en ina famiglia religiosa. Pli fitg cun las ovras che cun ils plects hajan ses geniturs dà in bun exempel al feagl: «Jau hai mai udì in pled maltschec da bab e mamma.» Diesch onns haja el fatg il nurser dal vitg ed el sa siemiavia gugent, raquinta frar Mattias.

«Dieu è insatge ch'ins s'occupa cuntut, cura ch'ins vegn pli vegl», uschia ha il mat pensà en ses temp d'emprendissadi da bostger. Che quest quint na giaja betg si, è el s'accorschì duas giadas tar accidents. Uschia saja el ina giada vegnì sut ina maschina da segar ed in'otra giada en il guaud sut ina buora. El è be per schabetg mitschè quellas duas giadas da la mort.

Vers la fin da l'emprendissadi ha in malruaus tschiffà il giuvenot: «Tanta glied cun fom datti sin quest mund e nus mangiain tschintg giadas il di il venter plain.» Il pli gugent avess il bostger interrut ses imprendissadi e fiss ì viadora en il mund per gidar. Quai ha ses bab impedì cun plects prudents.

## Dieu duai far!

Per gidar ils paupers dovri ina savida da



basa medicinala. Perquai ha Mattias cumenzà in segund imprendissadi da tgirunz. En quest temp ha el emprendì d'enconuscher sia amur. Igl è stà da Pastgas notg. Avant baselgia ha el vesì ella. Durant messa n'era ses chau betg propi tar il predi e las oraziuns. El era trubistgà. Tge far cun quests sentiments che siglian tuttenina a dies? El che vuleva ir naven.

E Mattias che discorra en talas situaziuns adina cun Dieu, ha ditg durant quest servetsch divin: «Sche Ti vul che quai duai dar insatge cun questa giuvna, lura stos ti procurar ch'ella fa l'emprim pass.» Suenter messa n'aveva Mattias betg uschè grondas preschas dad ir a

chasa. El leva gea che la matta plidentia el. Sez n'avess el mai fatg quai. E la matta è vegnida.

## L'amur ed il parvis

Igl è stà ina amicitia cun bleras bellas chaussas, ma era cun eveniments che fan mal. Els legivan omadus savens la bibla e faschevan part d'ina grupp evanangelicana.

Sin las spassegiadas cun sia muronza, haja el survegnì ina idea, tge ch'il parvis po esser. Avant haja el adina pensà ch'il parvis saja il lieu, nua ch'igl existia nagina fom, nagina said e nagins quitads. Sch'el giaschaiva dentant en il pastg sper sia charezzada, lura haja el sentì ch'il

parvis è dapli: «Là vegn jau charezzà d'insatgi, ed jau dastg era charezzar insatgi cun tut mias forzas.» Questa amicitia è en la regurdientscha da frar Mattias insatge fitg custaivel, era sch'ella ha gia baud cumenzà a ballucar. Suenter dus onns curt avant far spusalizi è il pèr ì d'part. Per Mattias era il desideri d'ir davent anc adina pli grond ch'il giavisch d'avair famiglia. Malgrà questa discrepanza interna ha la separaziun chaschunà grondas dolurs tar omadus. Il giuven tgirunza ha pers ses equiliber corporal e spiortal. El ha cartì da na pudair viver persul. Tuttina ha el savì che sia decisiun, da betg vulair famiglia, saja gista.

## Duas emnas daventan perpetnadad

Intgins mais pli tard ha il giuven gè da far a Mustér. El ha vesì la claustra ed ha pensà: «Daco betg ir puspè ina giada a prender penetienza.» Onns ora n'era el betg pli stà en confessiunal. Pader Placi Berther era il confessur. Lez haja dumandà a la fin: «Na lessas betg ina giada vegnir si tar nus?» «Jau vegn gugent, ma be per fufragnar.» Mattias è ì ord confessiunal directamain tar il portal a dumandar cura ch'el possia ina giada vegnir per duas emnas.

Cun duas emnas n'èsi lura stà nagut. Frar Mattias è restà in mez onn en «ses fufragnadi». I ha plaschì uschè bain en claustra ch'el è sa decidi da daventar benedictin. Ma betg si Mustér. El ha vulì ir ad Uznach tar ils benedictins missiunaris.

Cun insatge aveva frar Mattias anc fadia l'entschatta en claustra: El era s'imaginà ch'ins fetschia adina oraziun senza fin ed haja da far gigna incontin. Ch'ìls paders e frars mangian fitg bain e gugent, era l'emprim mument ina trumpada per Mattias. El haja protestà. Pader Placi haja dentant purschì maun

ad el: «Pren avunda e sajas engraziaivel. Lu daventas ti ferm e sas avoir quità da tai e dad auters.» Mattias era in pau spussà cura ch'el è entrà en claustra. Prest ha el puspè chattà forzas. 1986 ha el fatg sia empermischun perpetna.

## La fom n'è betg a Tansania

Dus onns pli tard è ses grond desideri ì en vigur. El ha pudì ir per in onn a Tansania. Igl è stà in bellezza onn: «Jau n'hai gnanca ina minuta laschè encrescher.» Frar Mattias veva schizunt cumpagnia da Rumantschs. Pader Clemens Giger e pader Baseli Fetz vivan en questa missiun. Ella sa numna Uwemba e sa chatta sin 2000 meters sur mar. La vegetaziun saja sco en Svizra ed il manaschi puril da la missiun ha 150 tocs biestgia, 5 chavals, 50 portgs e 5 asens.

La gronda fom n'ha frar Mattias dentant betg chattà en l'Africa. Cura ch'el è turnà enavos en Svizra, ha el vesì a Kloten be glied pitgiva. «Qua en questa surabundanza regia ina tala malcontentientscha.» Vid quai ha frar Mattias gè da morder plirs mais suenter ses return. En l'Africa aveva la glied – malgrà la paupradad – plaschair da viver. «I dat ina pli gronda fom, che la fom corporala. Igl è la fom spiortal», di frar Mattias. Perquai sa senta el oz era en Svizra sco missiunari. Ed el va gugent cun sia rassa a Turitg, era sche in u l'auter sa maina e guarda curios: «Quai dat impuls – ed in zichel da patertgar a la glied.» Frar Mattias sto tuttenina far prescha. Ils zains tutgan. El ha dad ir a chantar vespras. E da prender cumià di el: «Jau hai adina la speranza ch'jau hai pudì semnar in graun en ils cors da mes concarstgauns.» Lura sbriga el en sia rassa vers la porta baselgia. El sa maina ina davosa giada, fa adia e ri sco da sa legrar dad ir a chantar. I para sco sche frar Mattias avess chattà sia vaira amur.